

Dalam landskap ekonomi global yang semakin kompleks, isu tadbir urus kewangan tidak lagi sekadar urusan pentadbiran, sebaliknya menjadi penanda aras reputasi dan daya saing sesebuah negara. Pelabur, komuniti perniagaan dan rakyat menilai tahap ketelusan kerajaan dalam mengurus hasil negara. Oleh itu, reformasi percukaian yang inklusif, telus dan mampan amat diperlukan bagi menjamin keyakinan serta kelestarian ekonomi jangka panjang.

Selaras dengan usaha tersebut, Sijil Pematuhan Cukai (Tax Compliance Certificate – TCC) telah diperkenalkan oleh Lembaga Hasil Dalam Negeri Malaysia (HASiL). Sijil ini merupakan sijil akuan status pematuhan pembayar cukai yang dikeluarkan oleh HASiL. Sijil ini menjadi sebahagian daripada dokumen prasyarat yang perlu dikemukakan oleh pembayar cukai atau pembeda bagi permohonan perolehan kerajaan bermula pada tahun 2023.

TCC bukan sekadar dokumen tambahan, tetapi mekanisme kawalan yang menyokong usaha kerajaan mengukuhkan hasil negara, di samping memberikan keyakinan kepada komuniti perniagaan terhadap persaingan yang adil serta membina budaya pengurusan hasil yang telus dan bertanggungjawab.

Pendekatan ini membawa mesej yang jelas: pematuhan cukai bukan lagi semata-mata kewajipan undang-undang, tetapi penentu kelayakan dalam meraih peluang ekonomi.

Pelaksanaan dan Keberkesanan TCC

TCC ialah dokumen rasmi yang mengesahkan bahawa pembayar cukai telah menunaikan tanggungjawab percukaian mereka. Dua syarat asas untuk melayakkan individu atau entiti memperolehnya ialah:

1. Pengemukakan Borang Nyata Cukai Pendapatan (BNCP) yang lengkap dan betul dalam tempoh yang ditetapkan.
 - TCC wujud dalam MyTax bagi semua kategori pembayar cukai kecuali pembayar cukai individu yang mengemukakan e-BE (BNCP bagi individu yang tidak menjalankan perniagaan).
2. Penyelesaian bayaran cukai tanpa tunggakan.
 - Jika memerlukan ansuran, permohonan boleh dibuat melalui e-Ansuran dalam Portal MyTax (maksimum 6 bulan).
 - Ansuran melebihi 6 bulan perlu dikemukakan di Pejabat HASiL yang menguruskan fail cukai.

Selain itu, berdasarkan garis panduan rasmi HASiL:



Daftar dan Pastikan Maklumat Cukai:

Pembayar cukai mesti mempunyai *Tax Identification Number* (TIN) dan mendaftar melalui e-Daftar di MyTax jika belum ada.



Semak Status TCC dan Cetak:

Log masuk ke MyTax, pilih menu "Status MyTax", klik ikon "e-TCC" dan cetak sijil sekiranya status menunjukkan "Patuh".



Jika Status Tidak Patuh:

Pembayar cukai perlu mengemukakan BNCP, melunaskan tunggakan cukai atau membuat ansuran bayaran.



Tempoh Sah Laku:

TCC sah sehingga 31 Disember tahun semasa.



Semak Ketulenan:

Ketulenan sijil boleh disahkan dengan mengimbas kod QR melalui aplikasi mudah alih MyTax.



Sijil Pematuhan Cukai (TCC)

Menyemai Budaya Pematuhan, Mengukuh Ekonomi Negara

Dengan menjadikan TCC sebagai syarat penyertaan tender kerajaan, hanya pembayar cukai yang berdisiplin dari segi fiskal layak bersaing. Langkah ini sekali gus memperkukuh integriti perolehan awam, memperluas asas percukaian, menambah hasil negara serta mewujudkan persaingan yang lebih seimbang.

Implikasi Strategik kepada Ekosistem Percukaian

Pengenalan TCC membawa kesan lebih luas daripada sekadar kawalan teknikal percukaian.

- **Dari perspektif kerajaan,** TCC meningkatkan kutipan hasil, menggalakkan pematuhan cukai secara menyeluruh serta mengurangkan risiko ketirisan dana awam.
- **Bagi sektor swasta,** TCC menjadi pemangkin kepada amalan pengurusan percukaian yang lebih sistematik, meningkatkan kredibiliti perniagaan di mata pihak berkuasa dan rakan niaga.
- **Dalam konteks nasional,** TCC menjadi penanda aras baharu budaya tadbir urus kewangan. Proses perolehan kerajaan bukan sahaja menilai kualiti produk dan perkhidmatan, malah turut menekankan integriti fiskal perniagaan.

Dengan itu, TCC melengkapkan agenda reformasi percukaian negara berteraskan keadilan, ketelusan dan kelestarian - menjadikan pematuhan cukai sebagai nilai tambah yang membuka peluang ekonomi lebih besar.

Kesimpulan

Pelaksanaan TCC membuktikan komitmen kerajaan untuk memastikan keadilan dalam proses perolehan, memperkukuh tadbir urus kewangan serta menyemai budaya pematuhan cukai yang mampan. Lebih daripada sekadar dokumen, TCC ialah simbol integriti dan kredibiliti yang menyatukan kerajaan, sektor swasta dan rakyat dalam membina ekosistem fiskal berdaya tahan.

Langkah ini bukan sahaja meletakkan Malaysia pada landasan ekonomi yang lebih kukuh, malah menjadikannya lebih berdaya saing pada peringkat global.

Untuk pertanyaan lanjut mengenai TCC, sila hubungi:

✉ tcc@hasil.gov.my

☎ 03-8911 1000 (Dalam negara)/
603-8911 1100 (Luar negara)

🌐 Rujuk Garis Panduan Operasi Pelaksanaan Sijil Pematuhan Cukai (TCC) ke atas Perolehan Kerajaan di Portal Rasmi HASIL: www.hasil.gov.my

Artikel ini diterbitkan oleh Jabatan Khidmat Korporat, Lembaga Hasil Dalam Negeri Malaysia.

Sumber: HASIL